

金華黃先生文集

金華黃先生文集卷第五

續纂二

五言律詩

初至寧海

臨川危素編次

番禺劉耳校正

地至東南盡城孤邑屢遷行人雲作路累石海為田蜃炭村村  
白椶林樹樹圓桃源名更羨何處有神仙  
縹緲蛟龍宅風雷隔杳冥人家多面水島嶼若浮萍煮海鹽煙  
黑淘沙鐵氣腥停驂方問俗漁唱起前汀

洋山夜發

肅肅洋山暮倉忙拜水神吹噓端有力漂泊竟無津黑夜魚龍  
界皇天蟣蝨臣生還如偶遂敢憚歷微辛

次韻答陳君采兼蘭一二同志

溫詔欣初覩戎冠盡共纓如何滄海上獨看白雲生燈火三千

橫冰霜五百程誰須富車騎終古陋桓榮

憶昔雙溪上相逢暮雨時交游傾意氣談笑挹手儀草草中年別寥寥大雅詩受材知有分豐嗇竟誰同

不謂飄零日求賢網四張胡然卑小技乃爾悶孤芳寶唾非無色冥鴻詎有行散材何所似徒愧飾青黃

十載西州客論交著處新時時談述作一一望光塵澹月銀河曉暄風玉樹春幸令窺髣髴微薄尚何伸

默守知存道清言不廢儒身方同木石名已在江湖此士須前席何人屬後車惟應新釣者縹緲識霞裾

尚想南歸始簪花出禁闥塵沙迷故步桃李借餘輝有日酬天造終身返布衣風流成二老巾屨倘相依

亦有貞居子難忘太古情詩筒來絕響茗碗出新烹磊落軍傳

意蕭條異代名無為念離別惆悵不能平

讀陳制幹遺事

歷歷青雲上飛揚彼一時深春曲江宴清夜鄜城詩老去山河在仙成日月遲空言徒有託千載欲誰期

題刻溪張氏書樓

未杪出飛樓仙山在上頭可能無客至小為借書留芳草春仍長虹光夜不收如何試乘興一棹剡中舟

陸氏水軒分韻得揚字

高會軒楹敞清秋笑語涼行雲隨度曲野水映飛觴坐挹才華盛衰慙鬢髮蒼新詩穿窅眇何力共游揚

寄黃伯陽

揆別逢春雨移舟落夜濤忽驚滄海大轉覺碧雲高揚子多奇

字王祥忝佩刀深情空繾綣短髮正刁騷

送陳養直歸四明

迢迢浙河水同渡不同歸執袂方成別驚帆已若飛野橋行酒處風雪去時衣瞻望嗟何及天長鴻鴈微

題天童壺秀軒

名山標巨剎樓閣在青冥別路通禪窟當軒列翠屏暝禽多雪色偃樹盡龍形負土新成塔非才愧勒銘

隆山牟先生挽章

并絡收英氣文昌返列星能官須閑閱仍世覲儀刑漂轉逾三峽森扶並五丁芝蘭紛滿砌橘柚歛充庭它日看空壆羣公羨發硎鼎湖驚掃迹華表訝摧翎風物嗟王粲心期託管寧乘桴良已後抱瑟匪求聽此道誠何病明時忌獨醒迢迢瞻北極哀

衮化南溟薦剡多新墨恩袍祗舊青故應種座冷不愧草堂靈  
食檠餘深味懸車及暮齡一朝傷永訣千古閱遺經謬忝鴻私  
久徒增雪涕零無辭歌薤露有恨寄泉扃

送胡允文紹興錄事

斯文千載後一髮渺存亡尚喜衣冠舊能傳翰墨香春秋嚴助  
對富貴買臣鄉莫厭官曹劇諸生在鴈行

入京道中寄同里諸友

十年州縣底及此望京華客路時時雨春江岸岸花何方堪報  
國將老更浮家可得同攜手山顛復水涯

送句龍提舉之雲南

獨抱文章印驅車背朔風行歌萬里別聲教百蠻通列郡創殘  
後諸生色咲中誰當偕計吏封殖待新功

癸酉四月同子長至赤松子長先去遂獨宿智者之草堂  
已而子長與正傳俱來同一上人宿鹿田遊三洞還過山  
橋至潛岳謁故中書舍人潘公祠堂復迴智者而別

昔共張公子翩翩訪赤松重來逾兩紀獨宿去孤峰古木蒼陂  
映禪房側徑通夕陰千嶂黑人語一燈紅幸及軒車會寧辭杖  
屨從相看如夢寐健走愧兒童春去山仍好林深磬忽窮天低  
時墮雨寺遠但聞鍾弔古田無鹿探竒洞有龍幽尋穿竇窈窕高  
步躋瓏靈草多成藥疎篁不作叢嵐霏生曉暖野色在空濛下  
瞰疑無底言旋復向東巖阿樓斷礎煙際出飛淙細路緣苔磴  
危橋跨石硯泉依山曲曲雲與樹重重巨榜標名岳穹垣護畝  
宮倚闌斜日下入室老僧逢零落螭頭墨荒涼馬鬣封不才持  
薄祿終古望遺風弛檐雲關裏傳觴雪峽中追趨煩道侶述作

付文雄急景真流電浮生尚轉蓬後期觀歲晏來往莫憧憧

送趙仲理御史

籍甚聲華舊頻年沐盛恩校書天祿閣執法太微垣攬轡炎埃豁揮毫玉露繁庸疎徒自咲投贈欲何言

送趙宗吉御史

憶共趨鰲禁驚聞正豸冠汗顏居館下矯首望臺端去路黃河直飛霜白日寒仙舟如可託歸理釣魚竿

送王道一郎中

使者下青冥郎官動列星揚旌開瘴癘持斧用雷霆遠俗難馴化儒臣解引經無知多詿誤能勿望平亭

送宋顯夫憲僉分題得邵伯埭

謝公千載後陳迹在淮壩遺愛傳終古嘉名配昔賢藕花方爛



燭使節莫留連移取甘棠樹分栽郢水邊

送宋翼卿照磨

莽莽關河路西征獨據鞍借材蓮幕底養望柏臺端指日傳溫  
詔朝天正法冠廣平心鐵石寧憚朔風寒

送潮陽蘇縣尹

夜水藏蛟鰐秋天卷瘴雲田多陶令秫石有大蘇文巧宦誠為  
樂脩才況不羣尚煩驅筆陣時復張吾軍

送蘭縣尹

蘭氏多兄弟才名萃一家嗟君本朝士出宰向天涯度嶺三冬  
雪行春一縣花應憐未歸客鞍馬尚風沙

送馬伯忱教授

卓犖青雲彥飛騰及妙年書成天祿閣座有廣文羶九陌車塵

外千軍筆陣前白頭慙倚席臨別思茫然

送方叔高巡檢

矯矯列仙儒瀛洲路不迂大書歸石室壯志在桑弧田里方高枕雲山總畫圖登臨屬多暇寧復嘆馳驅

送劉子簡

難弟與難兄專門用一經夫君眉更白諸老眼多青薦剡登天府揚帆指洞庭何官不可樂離合任雲萍

題道士熊君壽母詩卷

跨鶴出山中春衣密密縫度關占紫氣賜酒折黃封介壽慈顏喜承家積慶重蘇耽却來否石上有仙蹤

同劉遂初脩撰周伯溫編脩任大瞻經歷王繼志架閣西山行香次遂初韻

仙馭賓天久衣冠此出游祗園金地古汾水白雲秋謁拜陪諸  
彥躋攀展寸眸始知山水窟近在帝王州深岫藏青靄平蕪映  
綠疇層臺臨太液環海像瀛洲粵自遺弓無後望難旒明庭  
虛次舍綵纜舊維舟陞戟盈千列靈輿副九旂祠官偵伺謹中  
使往來稠備禮兼今昔求神遍顯幽琅函開貝葉玉璫薦黃流  
盼蠻人天合輝光日月侔遙看陳羽衛疑是問龍樓花雨繽紛  
落香煙泱泱浮重關羅虎兕簇伏擁螭蚪去去簫聲遠微微扇  
影收清都成夢境塵劫等浮沍歸徑綠湖尾殘陽掛樹頭舉杯  
相慰藉分席暫淹留物色迂行轡風寒嚴敝裘迴瞻天路求坐  
感歲時周戀闕慙衰朽非材墮謬悠詞林富鴻藻珍贈若為酬  
試院同諸公為主試官作

右轄升庸日秋闈獻藝初端居煩坐鎮妙東備賢書憶昔興玄

運惟天啓 聖謨教條行九有學業出三餘儒術俄中否詞場  
遂久虛綸言何噩噩髦士共于于吐握承謙德飛揚感壯圖至  
公留藻鑑成物待洪爐肅穆華星聚涵容化日舒誰歟隨計吏  
行矣聽傳臚橘柚

天朝貢參苓相府儲鋪張須鉅筆衰朽媿荒疎

試院同諸公為監試官作

文治回亨運群言協 睿謀設科存墜典傳

詔極遐陬風動黃簾曉霜飛白簡秋迂臨宣 上化精察副旁

求懷牒魚鱗集摘辭繭紉抽按行承獎飭鼓舞望甄收冰鑑垂

清照淵珠免暗投充庭先品物入彀總英游奏自蘭臺上名依

桂籍留神仙司下土桃李在南州使節光華盛公堂禮數優無

能裨末論傾詠獨綢繆

送餘姚孔學正

不到歷山前于今二十年忽聞東魯客去坐廣文壇短棹濤江  
外高齋海水邊風雲有新樂況及暮春天

遊石門淨勝寺

十頃蒼陂上山迴地勢偏屋樓黃面老碑掛赤烏年葉葉風荷  
顫層層雪瀑懸青燈夜寥閔獨照一僧禪

次韻王眉叟真人

歲晏驚黃落樓居隔翠微攤爐春滿座卧檝雨生衣大惠元非  
病高飛獨見機桃源多羨酒觴至且頻揮

泉月開金鏡仙山並玉簪杜陵茅作屋涼水布為衾有約陪笙  
鶴交談接芥針三神那易近失喜聽新吟

悼兩公

離別驚雲散那知竟不迴長期真滿供橫驚樂邦開一柱空危  
石重湖有劫灰去來誠夜旦覽物謾生哀

送鏐上人遊廬山

廬山幾千仞屹立大江邊地勝非人境雲深何處禪祥燈開黑  
夜怒瀑下青天物色撩詩興應須富近篇

送矩上人遊廬山

廬阜西江上秋風道路賒泉飛青玉峽池浸白蓮花此去聊乘  
興何時定到家憑高莫回首誤指赤城霞

游法華山回宿樓氏書房遙望嵩頭陀智者國師道場上  
清五雲龍壽諸山而未及其處贈同游傳生國章

故廬湖水曲門對法華山百里空荒外三峯晚靄間倦游煩汲  
引澗步強躋攀老怯高寒境非緣興盡還

小憇虛齋夕何人笑語同青雲一才子白髮兩衰翁節物逢春  
好名區有路通未能窮勝踐還徃媿匆匆

過永康桃巖

立石平如削飛雲近可梯莫窮千古勝但惜衆山低靈草經春  
長珍禽隔樹啼人言舊朝士感事有留題

七言律詩

闕下口號

滿駿先猷在作人忝陪多士奉 明綸端闥乍啓

清光近臚句高傳茂典新奎壁照臨回景運風雷鼓舞契昌辰  
不才何以酬 天造後詠菁莪樂至仁

賜第後歸謁郡府承為置宴口號

拜賜纔霑雨露香又驚盛典出黃堂鳴騶合遯迂千騎坐席雍

容累百觴它日同鄉脩故事不才終古被餘光承宣 德意逢  
明牧諸彥能無共激揚

郡廳宴集之明日鄉先生復為置酒重述口號

去年此日宴瓊林雨露先華映古今稱慶謬承賓禮重徽榮彌  
覺

主恩深少須 天詔從容至坐看宮花取次簪千載斯文寄來  
哲可應外物累初心

北山歸路呈古心師兼簡方外諸友

尋幽偶向靈源宿却過雲關望翠微初日映空千樹立驚風遶  
磴百泉飛舊題歲月人頻異乍別煙霞路易非幸有潘郎遺事  
在何時一鉢去如歸

送樊生歸鳳翔



負笈東遊萬里餘，翩然却去復踟躕。  
金臺不入平生夢，石室曾窺未見書。  
赤日蒼涼雙袖窄，黃流渺漭一帆孤。  
明時急士方如渴，看爾重來出有車。

送祝鍊師祠武當山

春風馬騎過流星，西指神山百丈青。  
白道蜿蜒通使節，玄關額額護祠庭。  
按行石樹多千歲，叱咤雲雷有萬靈。  
想到天池却回首，笑看日月兩浮萍。

喜趙繼道至有懷陳君采

匆匆聚散定何常，耿耿心期故未忘。  
草木關情人事異，雲霄迴首路岐長。  
交游歷落銀河隔，製作紛紜瑞錦張。  
為語何時共傾倒，秋床風露已生涼。

寄別宋推官

目斷仙帆去莫從翩然心逐北飛鴻未忘綠幕追遊盛況忝黃  
堂禮數崇南國幾人歌召伯漢廷有日相于公悠悠聚散何堪  
計趨走終期出下風

送鹽官傅都目

春風匹馬去翩翩老佐名州鬢未斑遙數驛程知到日坐令官  
府靜如山河塘燈火機聲裏墟落鹽煙海氣間歷歷舊遊成夢  
寐可容乘興一追攀

送姜學錄

短褐蕭條兩鬢蒼逢人猶解說春坊雲霄有路新推轂風月傳  
家舊佩囊此去官曹雖冷落不妨門戶暫輝光况聞寮友多華  
冑休暇過後樂未央

何山夜宿

藏舟夜聽西窓雨一別重來二十年何氏殘編非舊讀胡公遺  
碣是新鐫山中倘遂招為隱教外寧須別有傳已對爐熏消百  
念感時懷古自茫然

婺州治中致仕朝列朱公挽章

朔風吹淚濕寒雲忍見層丘卧石麟千載文章非小技半生州  
縣祗勞人黃金帶重班方峻白玉樓高記又新回首慈恩它日  
事不才終古望清塵

寄子訥千壽道二同年

憶同鵠立落天關清漏無聲虎豹閑黃榜未開齊望拜紫衣高  
唱遽分班已驚恩出尋常表更羨身居季孟間海國隣疆幸無  
遠可容接武向蓬山

天台道中

殘雪初乾不作泥微陰豁盡衆峰齊梅花浩浩天相映桂樹團  
團鬼所棲春水未深容度馬午煙孤起忽聞雞仙人祇在丹丘  
頂應是青雲別有梯

送麗水應教諭

諸公攜手賦明光此士猶令滯一鄉肯著麻衣號遺逸勇持木  
鐸布文章仙山高步冰霜峻燈火新題霧雨香未可區區輕十  
室共看它日富才良

送雙谿孔山長

歲晏天涯偶見君忽驚飛袂逐風分諸公政爾諄先覩家學能  
無出異聞紅日遠帆先去鴈碧溪涼雨未生芹悠悠聚散何堪  
計目斷江東有暮雲

象山東門別壽上人

一咲相看寂寞濱杖藜還往得蹊頻猊床白拂風標舊寶網金  
沙世界新後會山中應有日定知海水未揚塵而翁贖語今多  
少此去如何舉似人

送杭州貢教授致仕歸里

宦情鄉思兩依依獨裏寒韁去若飛歲晏忍為千里別林間驚  
見一人歸官河遠樹迎仙棹夕日暄風颺綠衣漫使臨岐生悵  
望可容泉石借餘輝

送宋兵部還京

冰壺炯炯映高秋端是人間第一流小屈神仙來下土為栽桃  
李遍南州鳳池歸近聞佳語金匱書成識壯游顓頊陳人頭半  
白臨岐空望李膺舟

送陳漢卿

三年坐客詠無羶一日為郎望若仙共喜貔貅閑白晝忽聞鷄  
鷄上青天忘形不用公榮酒先路空慙祖逖鞭此夕臨岐倍惆  
悵水煙沙雨正茫然

送姚利用

青春白日映紅顏空谷寧容久棄捐新刷鳳毛看有色勇穿虎  
穴去無前風雲政爾多良會山澤終然要列仙故里樵柯如好  
在歸期莫指後千年

陳山晚泊

一柱孤撐杳靄間人言此是客星山流風百世今誰嗣應  
詔諸生故未還荒塚草深迂石路高齋月滿悶松關窮年漫迹  
滄江上及此維舟獨厚顏

送三高祠陸主奉

垂虹古祠煙樹新昔賢高致久無聞  
盡圖想像空陳迹譜牒流傳喜到君  
春水白鷗分座席寒泉秋菊薦爐熏  
臨歧何限滄洲意目斷風帆天際雲

送陳推官之信州

三朝兩世掌絲綸異代仍瞻玉樹新  
尚喜傳家餘宦譜又聞議獄用儒臣  
中年離別情何限南渡風流迹未陳  
遙想郡齋多暇日肯憐州縣正勞人

送胡古愚蕙間道傳博士

坐擁臯比十載餘忽聞飛鶚上公車  
此行未可輕投筆隨處猶須少曳裾  
燈火尚慙餘事在雲霄轉覺故人疎  
為言留滯今頭白無用諸公薦子虛

送淮海書院丘山長

遙望官河駐綵桃春深絳帳不蕭條已驚雨露恩光厚還喜山川物色饒盡日樓臺入載酒隔江燈火夜吹簫定知館下多才彦政樂風雲對一瓢

留別錢翼之

矯首清標二十霜白頭傾蓋鄭公鄉忘形肯厭追遊數借潤頻飛翰墨香世態浮雲看不定別情流水去方長杏花時節霏霏雨誰共春風舉一觴

送王景文應薦北上

自是春風席上珍雲霄有路獨逡巡未妨豹隱山林久及見龍飛雨露新黃甲駸駸傳盛事青衫獵獵愧陳人瀛洲此去無多步應笑蹢躅尚後塵

送胡允文楊廉夫應薦北上



顓頊陳人復此邦坐看仙棹發濤江  
華年春柳嗟難及壯氣晴虹詎易降  
會向君門俱第一誰言國士定無雙  
瓊林宴罷歸來日共話芭蕉夜雨窓

送楊廉夫天台縣尹

十載韜藏席上珍爛然錦製一時新  
羽人笑拍雲為路山鬼愁聞筆有神  
遙想到官多暇日不妨領客試行春  
石橋瀑布逢佳句取次飛箋莫厭頻

諸暨休日偶書

一室蕭然似冷官更無車馬駐江干  
天清不斷絲絲雨春淺猶生陣陣寒  
公事癡兒何日了雲山圖畫惡人看  
輕風正滿微黃柳誰與相從試凭闌

湖心寺夜坐

蕭蕭涼月滿池臺  
水檻風櫺四面開  
一柱殘燈何熠煜  
半簷衰柳故崔嵬  
謬持微祿知無補  
未謝餘緣得重來  
塵土馬蹄明日事  
可容良夜廢啣杯

次韻荅徐文蔚

一別溪頭十五春  
歸來烏帽尚黃塵  
故應用意崎嶇外  
未忍忘情寂寞濱  
圖畫雲臺非我事  
掛冠神武獨何人  
也知州縣徒勞耳  
相見空慙白髮新

送黃季與歸盱江

天際江流映碧山  
春風浩蕩一帆懸  
長吟白雪誰憐爾  
却望孤雲獨慨然  
逸少向來曾誓墓  
元龍此去盍求田  
相逢况復敦同姓  
聊寫深情入短篇

次韻申屠子迪試院唱酬

一札天開雨露香青冥萬里看飛黃共驚鵲立多如堵誰取龍  
標遠檀塲塗抹已忘年少樂卷舒偏喜漏聲長從渠曲學能阿  
世敢謂公孫策最良

次韻曾待制試院九日

坐客今無賀老狂酒徒寧復舊高陽下風共仰衣冠盛餘潤仍  
分翰墨香佳節政須開咲口多言非必有它腸何人可與公榮  
飲願摘寒花侑一觴

兩立諸郎輟苦吟華堂星聚坐方深放懷不厭如澠酒過眼休  
遺擲地金古往今來千載意東塗西抹少年心花前起舞為公  
壽肯作牛山淚滿襟

題胡大叅禱雨詩後

雙徑迢迢一綫通仙山九鎖白雲封黃塵果日迂鳴騎黑夜幽

潭起蟄龍農父不須愁歲事川原還喜見秋容明公自是為  
手四海蒼生望正濃

送馬之驥同年

一從鴈塔共留題回首何人在鳳池坐閱歲年今若此久居州  
縣亦奚為鳴琴書靜魚龍聽落筆風生草樹知行看金屏署名  
姓應憐樗散鬚成絲

送汪臣良縣丞之京兼簡諸同年

文場雜選盛才賢共羨青雲獨妙年祗謂種花能滿縣忽聞騎  
馬去朝天臨分無用歌三疊有作時須奏一篇若見鳳凰池上  
客為言顙顙浙江邊

送顧仁甫上計京師

憶昔曾隨計吏行浮沈州縣竟何成涼風嫋嫋仙舟去夕日依

依魏闕情金匱故藏多鉅典石渠高論盡鴻生棲身朱墨非君  
事早晚公車上姓名

送沙彥文架閣分題得西山

憶昔寒江破浪歸西山回首落煙霏忽逢朝士登舟去如望仙  
人拔宅飛游戲何妨依綠水追趨早已到黃扉公餘若過滕王  
閣為捲珠簾挹翠微

題金明宴游圖

危樓縹緲碧波中曲檻方櫺面面通雲氣傍花如欲雨柳絲垂  
地不驚風千年華表人非是九奏鈞天樂未終更有殘山并剩  
水煩君回首六橋東

送蘇伯脩御史

君別鰲峰我獨留又聞驄馬向南州振衣忽若神仙去落筆遙

生草樹秋封事皂囊須亟上  
藏書金匱待窮搜北山猿鶴如無恙  
為報詩人已白頭

送仇治書赴陝西行臺

妙東驚聞出九重路入猶識舊乘驄  
久陪廟筭知無敵復覩臺評用至公  
攬轡清風何颯颯浮關紫氣已葱葱  
齋居決事須公等歸觀行看馬首東

送徐教授

麻鞋厭踏洛陽塵莫共簷花試一搏  
遙想清風問前路不妨紅日在西軒  
米家書畫隨歸棹白傅林塘近故園  
館下諸生虛悵望蒼蒼煙霧隔龍門

送許錄事

劇曹自昔號難為敏手如君直小施  
故喜將迎多暇日獨憐趨

走不同時滄波古木知章宅衰草寒煙逸少池回首舊遊成夢寐可無新語慰相思

送唐真人歸江陵

荆門霜落布帆開晴日空江轉怒雷應到故園迴北斗却從雲氣望蓬萊兒童不識千年鶴冰雪相看一樹梅莫羨登樓是吾土玄都觀裏待重來

送陳法師歸建康

嫋嫋天風颺六銖玉函新捧紫泥書遙知華表歸來處猶記崆峒訪問初上界于今只官府仙人自昔好樓居腐儒頭白慙無用空抱道經望石渠

上巖寺訪一公

曉色微茫尚帶星脩蹊輦確斷人行獨支瘦竹身猶健高入重

雲地忽平落月正當山缺處細泉頻作雨來聲上方燈火青林  
曲隱隱疎鐘一再鳴

寄題高遠樓

聞道危樓架沈寥樓前物色不蕭條窻臨謝傅祠邊樹門對曹  
娥渡口潮解使詩人爭應接也知老子極風標倦遊已忘山陰  
路勝踐仍須折簡招

送李教諭

片帆西上興悠哉小室如舟絳帳開山縣官田生首藉故鄉雲  
氣陽蓬萊少微有日占星動滄海何年載月迴慚愧臨岐無可  
贈因風聊遺一枝梅

題東柯谷圖

長松密竹翠交加洞府新開碧海涯石上仙人留足迹春深礪



水出桃花流傳圖畫來千里生長兒孫只一家目斷飛鴻那可  
到舊遊空指赤城霞

聞趙繼清調安陸縣尹

慈恩塔上墨猶鮮一別重來十七年相見都門驚判袂又聞澤  
國去鳴絃素衣久出風塵外青瑣行依雨露邊歧馬望君先數  
日縣花雖好莫留連

送趙繼清潮州推官

相國南遷有故居理官高選出新除承恩特與金魚袋訪舊爭  
迎駟馬車春入園扉庭草暗天低驛路嶺梅疎鳳池不隔同年  
面歸及將花鴈影初

題雪竇妙高臺

偶為清遊宿梵宮凌晨試上最高峰水翻雪色寒猶落雲掩丹

光遠莫重舊有一僧能跨虎近聞三洞盡藏龍  
下方車馬應難到煙際惟聽日暮鐘

題觀海圖

昔年解纜岑江上初日團團水底紅  
鼉吼忽搖千尺浪鷗飛仍挾半帆風  
遙看島嶼如星散抵謂神仙有路通  
及此棲身萬人海舊遊却在畫圖中

送張法師召嗣天師於龍虎山

甘泉久矣候神仙何日靈風響佩環  
洞府樓居雲霧裏星槎使節斗牛間  
潛蚪有待將為兩跨鶴相從早出山  
歸及皇州春色好一時紫氣滿函關

送胡古愚

白溝河水照行裝楊柳春旗日影長  
傲兀鄭公新座席歛藏馬

史籀文章談經安用青油幕載筆徐歸白玉堂北望京華天尺  
五牘收餘興入奚囊

送壽應奉赴興國經歷

退直承明未倦遊獨隨遠牒向南州清江短棹蒹葭雨斜日虛  
庭鴈鶩秋小却猶為蓮幕長重來應到鳳池頭予環行矣聆佳  
語什壻蠻貊賦別愁

送麥敬存檢校

天邊多角自戕戕老矣南公懶上坡省署六曹新檢正著庭三  
史舊編摩紅蓮幕底秋光淡黃鶴樓前月色多莫笑鄭虔官獨  
冷別時聊唱醉時歌

送陰陽胡教授之四明

手挾飛雲萬里遊朔風雨電弊貂裘忽聞水北山人去不作周

南太史留炯炯心胸  
蔽列宿駸駸步武近瀛洲  
此行莫厭官曹冷  
猶勝寒儒老一丘

送黃生歸廣州

萬里來充觀國賓  
春風座上俊才新  
政慙杜甫敦同族  
忽報何蕃去省親  
歲月如流須倜儻  
雲霄有路莫逡巡  
異時鄉郡知名士  
金榜曾為第一人

送潘生之江西

綠楊堤上時風輕  
屈指歸人第一程  
萬里江南新驛使  
十年憲下舊書生  
青雲共羨飛黃去  
白晝何妨衣錦行  
笑殺四門韓博士  
夜深深還對短燈檠

送吳生歸黃巖

南州才子氣如虹  
一日聲名徹九重  
退就諸生居六館  
坐觀文

史富三冬揮毫小試絲綸手獻賦徐開錦繡胸暫爾稱觴拜家  
慶明年歸有紫泥封

次韻孫伯剛龍虎臺卽事

秋風原上獵塵開曉日天邊羽衛來誰念艱難獻無逸但聞歡  
樂詠靈臺時巡不厭蒙霜露清問應須及草萊絲鬢廣文何補  
報莫言相遇且銜杯

題天雲詩卷

一錫秋風信所之漫將外物託心期雲根元自無裁處天路何  
曾有到時卽色是空應已悟安名立字復奚爲欲相點綴忘言  
說坐看爐煙裊碧絲

題李氏榮壽堂

吾親疇昔被恩封幸與公家具慶同仰羨班聯方貴近光膺寵

數獨尊崇蘭臺徽省歸休日鳩杖魚軒笑語中倘念小人今有  
毋滄江願乞半帆風

壽汪太祝父六十

獨專一壑住深幽不換人間萬戶侯故里樵柯猶在手新年花  
甲始平頭靈椿丹桂聲華茂墨綬銅章寵數優舊賜黃封宜介  
壽飛觴應度穀江流

壽胡古愚

千軍筆陣凜英風傑直難淹禿髮翁坐久無羶如鄭老年堪入  
社似溫公夜深虛室生純白春在酡顏借晚紅九十馮唐纔不  
仕錦衣歸去莫匆匆

壽夏真人

兩人一百二十歲愧我先成禿髮翁首宿盤深差可戀蓬萊路

近若為通縱令地位仙凡隔未害生年甲子同大斗與霞方介  
壽衰顏可許借春紅

次韻題劉氏石壁精舍

佳城杳杳隔千峯精舍寥寥一徑通夜靜寒泉猶映月秋深老  
樹不驚風舊題尚喜苔碑在高卧無令蕙帳空我已倦游今白  
髮有山如此願長終

送葉仲與巡檢

重著儒冠望帝鄉翩然一舸犯晨霜秋來鬢髮依前黑日射  
河流徹底黃此去乘槎須有路可容執戟更為郎絲綸閣下多  
知己握手應分滿袖香

和外舅主簿公自為挽詩

五十年前馬上飛青春流水去難追一從玉樹歌殘後數到黃

梁夢覺時李賀元無樓可記劉伶漫有鍾相隨少須海上蟠桃熟歸蓬仙班恐未遲

留別一公琳公

浪走紅塵鬢已絲此身端合老巖扉興來復舉山陰棹別去仍留海上衣夜聽泉聲如雨落晴看天末有雲歸浮萍飛絮何時定空使詩人賦式微

送傅汝礪之安南

南徼車書路不遙秋風使節下青霄頗聞僚佐登才彥應有文章達教條日照樓船江水活天低銅柱瘴雲消歸時嶺上梅花發想見詩囊未寂寥

兩浙轉運司知事張公挽章

二十餘年立下風故家喬木鬱青葱群趨久識官曹貴末論難



裨鑒裁公九折鹽車方止止一坯文冢已崇崇英姿爽氣歸何處盡在山光水色中

題甯節婦詩卷

春旗柳色映門閭華扁新題節婦居作傳小裁青竹簡疏封近降紫泥書河壩松栢風煙外階祀芝蘭雨露初三金及親殊未晚花前何日奉安輿

送孔御史歸曲阜

清流共喜聚群賢新渥時聞下九天東觀紬書何日了中丞遺笏要人傳過家莫久依林廟封事先須徹御筵千載斯文寄來哲臨分握手重懸懸

送龍南歐陽縣尹

絲綸閣下半同袍獨上南舩去莫招出宰不嫌官俸薄過家未

覺驛程遙長溪白石晴雷轉深洞黃茅毒霧消想見行春有錢  
句坐令遠俗變風謠

金華黃先生文集卷第五

金華黃先生文集卷第六

續纂三

贈黃資深

臨川危素編次

番禺劉耳校正

涼風蕭蕭吹敝裘三年小作周南留相逢傾蓋盡青眼肯抱遺  
經空白頭捧檄定知毛義喜著書非有虞卿愁春秋決事待公  
等莫戀寒糴成久遊

題張武定公死事詩卷後

古稱馬革裹尸還祇有空言世共傳一死如公良偉甚百年遺  
廟獨巍然要從身後觀餘烈試聽軍前奏凱還文武衣冠方迭  
起後先奕葉更綿綿

題王君冕同年芳潤亭

花縣歸來晝寂寥終南山翠湧亭臯林深未覺蘭蓀變天遠何  
妨雨露高此去漑根須食實誰分賸馥與殘膏行看小試揮毫

手香霧霏霏滴鳳毛

丁文苑同年哀詞後

自別瓊林雨露邊江湖目斷繡衣前禹門尚想龍初化遼海驚聞鶴已仙烈日秋霜空耿耿重山宿草正芊芊不才後死知何用坐對諸郎獨泫然

送尉我誠道州經歷

一別垂垂四十年朔風吹鬢雨蒼然寒羶久坐歸何日上幕初登望若仙莫使催科書下考盛談名理繼前賢春生馬首逢迴鴈併寫相思入近篇

送畢縣尹

歸途環佩曉珊珊白日青天映羽翰疑是省親辭太學驚聞出宰用郎官花迎墨綬春光暮風引仙舟海色寒想見捧觴仍戲

綠鄉人爭作錦衣看

送陳季和

高齋燈火正蕭條忽溯天風上沈寥共喜彈冠如貢禹豈期投  
筆學班超時桴鼓元無用歲晚弓旌倘見招雪後江南春水  
活重來莫厭驛程遙

送陳君歸江西

咫尺清光近王除姓名何不達公車也知賈傳今無策猶幸虞  
卿舊有書江上歸帆隨去鴈年來旅食厭騎驢諸公正索山人  
價能勿相招學隱居

送張良卿學士之淮南

坐殿流塵拂面紅行携涼月下青空三千里外揚州鶴四十年  
前御史驄先廟鐵衣猶卧壁兒郎玉帳已生風貞元朝士今無

幾歸及花時一笑同

次韻蘇侍郎平村晚歸

中臺多暇獨儀曹  
退食歸來路不遙  
扶老未須蒼玉杖  
行春聊過赤闌橋  
揮毫風雨傾三峽  
聽履星辰接九霄  
愧我白頭方倚席  
敢將巴曲和仙韶

壽吳宗師

非煙瑞氣鬱嵯峨  
帝遣仙官下大羅  
坐看層雲三界小  
行周花甲十年多  
詞臣灑翰題真贊  
詔使傳觴薦雅歌  
少駐壺中閑日月  
長安銅狄要摩挲

嗣天師禱雪有應諸公咸為作詩邀予同賦

萬人舉首望蓬萊  
詔使函香出上台  
祕殿綠章方夜奏  
層城銀闕已天開  
新晴更覺西山好  
和氣應先北斗迴  
下土儒臣驚

偉觀仍聞鳳沼有詩來

送王法師祠武當山

二月春光盡不如綠楊陰裏度雲車  
獨持使節辭金闕遠上天壇禮玉虛  
候吏傳呼開洞府羽人點指望霞裾  
仙家近在蓬萊境歸及皇輿北狩初

送尚子正理問

上相臨分控列州理官高選用儒流  
風生使節聲華舊地近台垣寵數優  
南土政平多暇日西山氣爽入新秋  
公餘若過滕王閣煩為題詩在上頭

送蘇伯脩憲使

久叅法從侍凝旒忽擁幢輶按列州  
太史山川皆熟路淮南草木自生秋  
遙瞻龍節辭中禁尚想鰲峰接雋游  
樗散鄭虔無所

用韋搜巖穴副旁求

送王止善檢校

官無失政吏無私鉤校寧煩事細微遙想名曹多暇日不妨高  
詠發清暉潮生江上仙舟迴春到湖邊驛使稀送盡北來南去  
客石田茅屋幾時歸

送高唐李知州

來登延閣預時髦出守名州領教條已羨漢儒知吏事要觀齊  
俗變風謠雙旌前路方迢遞八座家聲未寂寥此去行須歸報  
政鳴珂幾日造昕朝

送傅汝礪廣州教授

耻學山人赴辟書勇隨使者駕軺車橫經久合居高座上冢應  
須過舊廬黑夜文星南斗外青冥鵬路北風初來期莫落梅花



後待詔先生席正虛

送劉遂初脩撰

近聞退直自承明，忽報揚鑣出鳳城。  
未老已嫌金帶重，暫歸不著繡衣行。  
故人尚作瀛洲客，歲晚無忘魏闕情。  
臨別贈言聊復爾，誰能持酒勸公榮。

送于指揮歸密州

故山東望路何長，遠奉靈壽歲予告公朝。  
存舊典疏封泉壤，發幽光總戎行復開。  
油幕倬直仍須赴玉堂，它日過家如上冢。  
歲寒松柏正蒼蒼。

題春暉堂

一別慈顏隔歲時，故山遙望白雲飛。  
近聞已拔仙山宅，不用更逢游子衣。  
九轉還丹堪却老，千年華表未容歸。  
寸心猶恐恩難

報擬託斯文重發揮

書巢張君挽章

歲晚巢君寄一枝上林無樹可相依  
不隨葉縣飛鳬去竟作遼東化鶴歸  
架上牙籤書在否門前珠履來稀  
春江如箭船如馬忍舟旌颺落暉

府判謝公挽章

換得朝衣不稱身勇辭新爵號遺民  
鍊成偃月爐中藥閱遍銅駝陌上人  
魯國靈光俄委地謝家玉樹正傷春  
忽聞舊唱貞元曲衰涕能無灑石麟

予與江陰何鼎叔鉉別三十六年乃相見於錢唐感舊述情謾成四韻

月寒霜樹久相依春去風花各自飛  
遠信已隨潮水斷故交渾

若曉星稀綈袍可戀知誰在青鏡頻看歎昨非正欲從君共傾  
倒莫言興盡便須歸

庚戌正月二十一日予與儒公禪師謁松瀑真人于龍翔  
上方翰林鄧先生適至予為賦詩四韻諸老皆屬和焉後  
三十一年歲辛巳正月二十三日過伯雨尊師之貞居無  
外式公劉君衍卿不期而集輒追用前韻以紀一時之高  
會云

廬山舊事誰能繼三十年前此會同偶爾共來今日雨蕭然猶  
有古人風坐深遙對花如霧興盡徐歸月滿空仰止前脩那可  
作聊追餘響託無窮

送式公歸高麗

錫凌空海上飛星河蕩漾宿雲波頗驚遼鶴歸來晚正值驪

龍睡覺時百尺珊瑚無地種  
六花薝蔔任風吹  
高秋蘭若煙波外  
此樂應須以自知

送史景福

十年相望各天涯  
上幕新開鬢未華  
日出公庭來鴈鷺  
風生老筆動龍蛇  
蜀鄉路遠春多雨  
江國雲深樹有花  
若見君家彭澤令  
爲言且莫問桑麻

次韻荅薛玄卿真人

都門一別向天台  
二十餘年獨此來  
衰朽尚慙沾祿食  
凡庸安得借仙才  
幸逢休運臨奎壁  
宜有英髦出草萊  
容我脫身巖壑裏  
龍鵠時復泛舟迴

送夢堂鹽公住開壽寺

天低海闊路微茫  
此去頭頭是故鄉  
但覺英游空裏北  
肯隨世

好薄淮陽至人無夢心華現壽域重開化日長  
歲叟有知應笑道吾孫也識老馮唐

送繼公住東掖山

西陵江上渡船迴東掖山中聘使催飛錫  
凌風天路永寶華如雨法筵開高談應有龍  
能聽佳句須令鴈帶來老矣江淹才欲盡暮  
雲凝碧思悠哉

贈龍山詞上人

舜江東下艤官船幾聽潮聲往復還老去未  
知重到日夢中誰識舊遊山秋風飛錫來天  
外滄海遺珠出世間為問而翁強健否龍門  
高絕許誰攀

題莫氏山莊圖

旋移小隱近南峯遠有咸平處士風山態近  
人猶偃蹇湖光無

雨亦空濛行春杖履時時到臨水軒窓面面通別作小亭供戲  
劇青帘搖曳杏花中

丁亥六月十三日上京翰林開院喜兩院長開府公俾為  
詩以志之

兩滬鰲峯長綠苔佳辰良會玉堂開涼生薰殿宸居近恩予官  
虛詔使來盡醉不愁騎馬滑新詩可待片雲催作霖政爾須公  
等行見文星入上台

安南遣使入朝用故事奉贄納謁于翰林其歸也次介黎  
括以贈言為請賦詩四韻以遺之

上聖敷文格遠人外藩脩職用儒臣並馳使介踰丹澍特設朝  
班覲紫宸炎海計程歸塔永都亭宴餞寵光新祇承德意勤宣  
布鼓舞為魚詠至仁

送徐志尹赴安鄉縣尹

自為從史直鑿坡幾見鄉山爛斧柯能事正宜忝筆削借才聊  
復試絃歌屈原故國蘭都長陶令公田林最多應咲衰翁苦留  
滯汗青無日欲如何

送陳元達代祠補怛落迦山

天下名山小白花鯨波帖帖度仙槎函香祕宇祈靈貺出節  
宸廷振使華殿榜舊諱韋誕筆錦衣重過買臣家相門喬木殊  
無恙萬古清風碧海涯

遊壽山五峯寺

鑿開混沌自何年广石垂空一髮懸飛瀑散為花雨落老僧長  
抱白雲眠舊遊不改桃源路化境寧同杞國天回視人間成壞  
相無邊劫海正茫然

送李師曾蔣仲善赴春官

憶隨飛鶚上秋天夢斷慈恩四十年及此鬢毛俱禿盡見君頭  
角共新然計偕已趣輶車動臚句行聽衛士傳紫陌紅塵衣易  
化看花得意莫留連

送徐教諭

苔生茅屋鄭公歸杜宇從今不用啼小雨輕風寒食後殘山剩  
水浙江西夜闌深巷猶燈火春暮高城自鼓鼙好向清時窮勝  
事花前莫惜醉如泥

次韻荅胡古愚博士

麻衣草座老仙翁曾及清時侈際逢行殿曉趨開豹尾禁林秋  
宴出駝峯休官尚想英游並愛客何嫌異味重况乃東陽山水  
窟主張風月有詩宗



予與子長以庚戌之春癸酉之夏兩至赤松今年秋復來  
則子長已倦游而予亦老矣同持者汪生元明許生存仁  
既又得龍丘余子方與俱行由小桃源登煉丹山謁二皇  
君祠回宿寶積觀感歲時之代謝念交朋之離合輒成短  
句奉簡子長

來往仙家數十秋未能長共赤松遊暮年幸已成初志吾土何  
妨為少留歷覽舊山如夢境喜逢新士總名流桃源迹在人間  
世誰解相從老一丘

丙戌中秋宿徐道濟書房即事兼懷永之郎中

天開屏嶂列奇峯永滿方塘碧鑑空十里平原無曠土百年喬  
木有清風高齋偶爾成三宿美酒欣然為一中坐對良辰并樂  
事興懷存歿思何窮

題畫卷

渡口歸舟取次橫  
歸人相逐望柴荆  
歲村古木株株暗  
背雨閑雲片片輕  
巨石孤撐如欲墮  
遙峯寸碧不知名  
披圖省識曾遊處  
日暮山陰道士行

送高生歸淮南

山林早已遂吾初  
湖海文遊日漸疎  
枉過謾勞千里駕  
清言難敵十年書  
要知俗學元無用  
且復歸求自有餘  
投我木桃何以報  
邊韶腹笥久空虚

送馬縣尉

炯炯半標玉樹枝  
神仙隱吏最堪為  
況逢繡水重清日  
正是金沙欲現時  
宿雨漲溪飛去棹  
微風拂地颭歸旗  
雲霄直上無多步  
揆別空慙兩鬢絲

送覺上人遊金華山

憶同夜上妙高臺坐聽泉聲響怒雷  
久別煙霞如夢寐舊題巖石長莓苔  
掛冠方厭人間事飛錫俄從天上来  
何處新春可娛客金華山色紫崔嵬

次韻伯雨臘月八日雪中同登來鶴亭

興來欲泛山陰雪不柰舟膠野水凝  
朝士白頭愁獨步仙人赤脚傲層冰  
招徠盡是雞群鶴趁附空轡驥尾蠅  
夜久松龕同擁毳絕勝保直有青綾

題張真人玄靜菴

一峯屹起碧嶙峋隱隱金雞五夜聞  
安用佳城開白日正須拔宅上青雲  
天垂龍井丹光接地折龜潭水勢分  
閣老新題今寡和往來仙子幸能文

五言絕句

題趙公畫蘭竹

猗蘭幽人操綠竹君子德夭夭彼棘心胡為久吾側

題錢舜舉作東坡畫竹圖

執筆不見人毫端走風雨至今身外身獨與墨君語

題馬虛中畫

人歸白雲處舟在清溪曲不聞欸乃聲但見山水綠

題郭天錫畫

漠漠疎林晚蕭蕭寒鴈鳴窮秋萬里客開卷若為情

題明公畫蘭

猗蘭如幽人不受塵俗拘墨卿亦何為挽之來座隅

題木石畫卷

山木則有枝白石何時爛長歌木石間冉冉歲年晏

七言絕句

青山白雲圖

十年失脚走紅塵忘却山中有白雲忽見畫圖疑是夢冷花涼  
葉思紛紛

松江舟中偶書

山房偶為故人留又領飛雲過別州白浪千花帆一葉茫茫天  
地此生浮

移舟夜泊華亭縣却聽吳歌思渺然最憶澱山湖北寺白雲堆  
裏看青天

追和景傳新店客舍壁間韻

我夢方酣子遽醒絕絃可復要人聽梨花寒食東風惡淚盡重

山宿草青

題蘇黃二先生像

五祖禪師出世人  
婆娑久已斷生因  
莫將描畫虛空手  
更覓當年身外身  
笑殺黃龍老晦堂  
相逢剛道木犀香  
披圖面目渾依舊  
鼻孔何曾有短長

題諸公跋子昂詩

晚生猶幸及諸公  
展卷還疑是夢中  
日暮沉聞鄰舍笛  
鬢毛衰颯正秋風

題宣和御畫

青城塵土畫濛濛  
百二山河一夕空  
收歛神功歸化筆  
野花啼鳥尚春風

宣和畫木石

石邊古木尚青枝  
地老天荒石不知  
故國小臣誰在者  
蒼梧落照不成悲

宣和畫牛

淺水平沙落鴈時  
長年願犢過前溪  
睿思東閣圖中看  
寧見北風吹草低

宣和畫鼠

膚藻徒煩飾細微  
撫時觀物重歎歎  
更無麟鳳游郊輒  
池籞秋風野鼠肥

武王扇暍圖

一夫偶爾獲清涼  
四海仁風孰奉揚  
有道曾孫不忘遠  
幸均此施遍羣方

洪涯出遊圖

靈仙飛化事難言  
驢背春風度市門  
不到人間今已久  
多應醉卧古藤根

題子固畫蘭

天人眉宇帝王孫  
憔悴寧同楚屈原  
何意清風明月夜  
盡將心事託蘭蓀

題子固墨梅

南渡倉忙彼一時  
孤臣曾賦墨梅詩  
安知京洛風塵外  
有此青春玉樹枝

題李早畫馬

平沙如雪草如煙  
想見春風士馬閑  
玉勒錦韉塵土化  
盡圖流落向人間



山水圖

老樹無陰石有稜  
亂山高下白雲層  
夢中猶識江南路  
惟恨舟人喚不應

海月圖

憶曾夜叩潮音洞  
海闊天高月正中  
坐對畫圖如夢寐  
六街塵土畫濛濛

水仙圖

脩脩翠羽映明璫  
誰遣乘風過我傍  
歲晏高堂空四壁  
一簾煙雨夢瀟湘

桃竹畫眉圖

說盡春愁額不成  
翠深紅遠若為情  
江南有客頭空白  
腸斷東風百轉聲

灤陽邢君隱於藥市製芍藥芽代茗飲號曰瓊芽先朝嘗  
以進御云

君家藥籠有新儲苦口時供茗飲須一味醞醕充佐使從今合  
喚酪為奴

芳苗簇簇遍山阿珠蕾金芽未足多千載茶經有遺恨吳儂元  
不過灤河

春風北苑闕時新萬里函封效貢珍羨爾託根天尺五不勞飛  
騎走紅塵

次韻虞閣學上京道中

欲去仍為一日留玉堂中夜有詞頭歸鞍曉逐南飛鴈猶及西  
山一半秋

送許叅政歸武昌別業

九衢蕩蕩綠槐風旌旆搖搖馬首東惆悵鳳凰池上客青天萬里一冥鴻

待漏東華霜滿靴掛冠神武意如何也知久歷中書考若比汾陽恐未多

檀筆書題墨尚新杏花零落故園春一從今日公歸後身到黃扉復幾人

曉日都門祖帳開路人嘖嘖歎賢哉東風無限新桃李不敢煩公手自栽

片雲爲雨出山時羣物欣欣各自私收歛神功去無迹尋常草木竟何知

往近韓家畫錦堂不將牙纛詫同鄉翻嫌相國歸來日腰下猶懸太守章

白袍鵠立漫紛紛遙聽車音共候門相見惟須飲醇酒看山看水堅忘言

南遊聊食武昌魚莫學騷人賦卜居

天子若思真漢相可云吾亦愛吾廬

五十人間富貴年山中道士早求仙石田茅屋歸無計愁絕燈前老鄭虔

龍門尚想舊同遊藥籠深慙晚見收新築沙堤却何日欲歸且復為公留

石節婦詩

伯也南征去不歸舅姑長慟小兒悲元戎奏徹饒歌曲來聽完州節婦詩

四皓園基圖

當局沉吟祗謾勞區區勝負直秋毫顛羸蹶項非君事賴有安  
劉一着高

屈原行吟圖

大夫生不遇明時故爾行吟楚水湄今喜太平歌既醉不須多  
和獨醒辭

瑶池春宴圖

西飛青雀幾時還貝闕琳宮縹緲間筆底春風殊未老蟠桃積  
核已如山

韓幹衣沙馬圖

韓生妙畫本無師正值沙場馬壯時虎卧龍跳未渠已朔風駿  
尾亂如絲

桃源圖

山容慘慘將為雨，雲氣垂垂欲傍花。  
莫問前村何處覓，垂垂羅盤石即吾家。

題高公畫竹木

木葉蕭蕭半欲空，竹竿裊裊不成叢。  
絕憐意匠經營處，都在風煙慘淡中。

版築圖

千載巖阿迹已陳，披圖風采儼如新。  
兒童曾祇羨麒麟畫，誰記前朝夢裏人。

牧羝圖

屬國歸馳舊使車，披圖仍是牧羝奴。  
不知它日麒麟畫，如此風埃滿面無。

甘美人家歲李翰林醉歸圖

可是良工筆有神  
寫成醉貌出天真  
雲牕霧閣時開卷  
咲殺當年捧硯人

大年小景

叢叢古木煙雲晚  
葉葉秋荷浦溆風  
開卷無聲元有句  
安排旋已落空濛

題平章康里公春日杏園西即事詩後

銷金戛玉音聲古  
扶石奔泉氣勢雄  
目斷雲車天路永  
小樓春雨杏花風

遠塵齋

寄言佛子善思惟  
莫厭塵勞事出離  
法界本來無遠近  
須知煩惱即菩提

怡雲亭

道人無物可怡悅偷眼看雲山石中為問風吹雲散後將何游  
戲太虛空

先照樓

初日團團出海東凌晨先照最高峰不知今日華嚴界樓閣新  
開第幾重

鳳山路駕雪軒

千山杳杳一僧歸鳳去山空僧不知忽見鷺鷥飛似雪逢人開  
卷覓題詩

月庭

夜久庭空萬籟沉寥寥一月在天心莫教見指先忘月更向申  
到處尋

次韻荅濟公



舊遊零落如星散坐對孤山似守株  
聽徹貞元供奉曲羞將短髮照西湖

病須藥餌親丹竈老厭書帷徹絳紗  
幸有文殊來見問更無天女散天花

白頭朝士方徒步欲過六橋愁路賒  
目斷紅雲花島上樓居縹緲梵王家

題清鏡閣

投老歸來賀監船何時結屋鏡湖邊  
羨公高坐毗盧閣萬水同波一月圓

題趙伯容鶴巢

平原公子去翩翩獨遡剛風直上天  
家近孤山春樹好歸期莫落後千年

老牛磨癢圖

感時懷古彼何人叩角商歌涕滿巾  
溪畔牧兒方自適癢疴都不切渠身

題文泉

石眼元無一尺深中涵千古聖賢心  
潘江陸海毋多詫好向源頭活處尋

飲後示陳生

歲終博士不超遷便腹先生醉欲眠  
匡鼎若來猶自可後堂無處着彭宣

野航亭

新亭下瞰碧溪流楓葉蘆花兩岸秋  
應念兒郎風雨外半區學舍小如舟

牧溪圖

何人貌此多牛翁世間之樂將無同我亦金華牧羊客可容添  
著畫圖中

鼠粟圖

四顧茫茫復畏誰終朝竊食可無飢是皆大勝倉中樂丞相當  
年特未知

紫菊圖

九陌青春拂面塵故園秋藥為誰新披圖風露生顏色萬里天  
涯有似人

倚梅圖

漉莫南枝與北枝得春多處即堪依故園夢斷頭空白千里關  
山雪正飛

題扇頭

倚簷老柳各成叢兩岸樓臺夕照中  
遠水如天舟似葉釣竿長

集一絲風  
峭壁攢峯上入雲玲瓏寶閣四無隣  
小橋流水春風外時見揚鞭舉棹人

次韻題墨梅

一自携家湖水東放舟時度玉花叢  
因君貌得橫斜影閑却孤山月一蓬

題澧水雪消圖

嫋嫋幽花野水湄暖風晴日雪消時  
竹君石友何為者春去春來總不知

題獨山詩卷後

一錫一瓶兼一單懸冰踏雪度雲端悄然獨宿孤峰頂不與叢  
林共歲寒

贈月江術士

坐閱人間六十年始知我命不由天千江一月無分照枝北枝  
南影自偏

題陸山長柳洲

簇簇春山紫翠圍瀾瀾烟水白鷗飛東坡正作西湖長一曲空  
慙賀監歸

題明公畫蘭

吳僧戲筆點生綃娟娟幽花欲動搖夢斷楚江烟雨外秋風灤  
水暮瀟瀟

題朱氏春雨樓栗里孤山二圖

柴桑處士晉風流苔徑茅廬竹樹幽  
睡起小樓春雨足披圖還喜見西疇

小樓春雨暗窓紗坐對咸平處士家  
盡日看山仍看畫方知梅有隔年花

東陽縣西道中

柿葉成陰綠滿村桐花覆地草連雲  
百年舊事無人記猶指前朝御史墳

壬辰三月遊左溪癸巳三月遊天宮有感而賦

頻年謁拜祖師庭祇有山光與水聲  
尚想玄珠密相付免令我慢肆譏評

金華黃先生文集卷第六

金華黃先生文集卷第七

續藁四

詔

命相詔

國家大事非獨運之所能成宰相得賢則百度莫不具舉朕臨御歲久望治日深聿資夾輔之功庸致圖新之效惟時並命允獲僉言中書左丞相朶兒只雅量足以鎮浮大器足以任重風由世胄誕紹王封恩威交著於一方終始殆逾於十載爰躋榮於台鼎荐作屏於藩維暨入總於憲綱遂延登於揆席克膺眷倚益茂聲猷屬以虛位而詢于在廷無若舊人之可與共政載加進拜式聳具瞻中書平章政事太平敦實而粹和周通而宏敏練達朝廷之大體光昭祖父之遺休念其帝室之勲臣賜以國人之氏族肅特風紀密贊事樞宜升廊廟之崇俾展經綸之

蘊璽為盛舉匪出序遷今命朶兒只為開府儀同三司上柱國  
錄軍國重事中書右丞相監脩國史太平為開府儀同三司上  
柱國錄軍國重事中書左丞相于以進退乎人才于以弛張乎  
政理凡制詔號令錢糧選法刑名造作于中書政務隔越奏請  
者以違制論便民事宜畫列于后

於戲左右厥辟尚賴同寅而協恭小大攸司各宜奉法而導職  
助成治化仰副至懷故茲詔示想宜知悉

招諭雲南土官等詔

朕誕膺景命君臨萬邦聲教所通無間遠邇矧此西南之地實  
我祖宗之民叛賊死可伐敢冒刑章作為弗靖侵掠境土戕害  
至人憫其狂愚累加招諭木賊執迷負固罔有悛心爰命將而  
出師以恭行乎天討指其巢穴取彼渠魁尚慮諸路甸寨土官



軍民人等或受制於兇徒相扇搖而構亂原其初志匪出同謀  
既處危疑遂懷反側庸伸訓告俾亟來歸詔書到日除死可伐  
不赦外應有被死可伐脅從誑誤之人納款出降者並免本罪  
各安家業元有官者悉復其官能生擒死可伐及殺獲其首級  
者具以名聞優加賞賚陞擢其死可伐族屬能生擒殺獲本賊  
者命為本路土官該載不盡事理令總兵官議擬申聞施行於  
戲咸與惟新式布寬條而示信自求多福勉思後效以圖功咨  
爾遠人體茲至意

制

二程子加封制

朕惟三千之徒莫先顏氏瞻言往哲式克似之故河南伯程顥  
體備至和躬承絕學元氣之會鍾於獨得聖人之道賴以復明

緊百世之真儒豈追崇之可後爰蒐盛典爵以上公於戲緬想  
德容儼揚休而山立聿新禮命孚渙號以風行耶此寵靈益綿  
道統可加封豫國公主者施行

朕惟孟氏以來千有餘歲不見先覺孰任其承故伊陽伯程頤  
本諸躬行動有師法謂初學入德始乎致知格物謂隨時從道  
在乎觀象玩辭遺書雖見於表章異數尚稽於封冊昨之大國  
庸示褒崇於戲規矩準繩庶有存於矜式火龍黼黻匪徒侈於  
儀章樞相人文以對休命可加封洛國公主者施行

也列里术兀追封雲安王制

天佑皇家既誕膺於正統禮嚴母族爰申錫於崇封祇率舊儀  
宜惟異數豐國公

故祖父也列里术兀英材茂挺盛德

昭宣朝夕恪恭秉純誠於帷幄子孫昌熾開積慶於宮闈推恩

及於外家列爵高於常等於戲遺音日遠永懷世祚之隆新社  
雲安尚服王章之寵我之自出朕豈有私可追封雲安王

也列里木兀妻丑哥追封雲安王夫人制

朕誕膺丕緒興懷母后之家祇若舊章并錫王封之貴賤其中  
饋盡婉上儀豐國公

故祖母丑哥寬裕在躬柔嘉維則

芝蘭盈室鍾秀異於雙枝蘋藻如蘩相潔齋於宗事既百年而  
偕老極一品以同封於戲列爵推尊莫若諸侯王之重傳家惟  
永保茲千乘國之榮尚其幽靈服此休命可追封雲安王夫人

帖木迭兒追封威寧王制

中天下而立爰昭德以展親外王父之尊庸推恩而錫爵德之  
盛者禮亦宜之豐國公

故父帖木迭兒正直而純明溫

恭而敦厚受天之慶嬪宗祀於宮中生朕之躬建母儀於天下

慨寒泉之莫及斯沛渥之宜頒於戲有畏而威儼衮衣而來格  
其寧惟永與磐石以俱安惟時英爽之靈服此便蕃之數可追  
封威寧王

帖木迭兒妻伯亦忒迷失追封威寧王夫人制

邦國之興必資賢於內助后妃之德常推本於母家惟數之隆  
於斯為盛豐國公

故母伯亦忒迷失出乎令族嬪此慶

門生我大任實稟思齊之教毓乎菲德遂膺成命之隆疏恩式  
考於彝章配德同躋於極貴於戲介福于其王母赫乎象服之  
宜積慶及其子孫永贊鴻圖之盛尚其幽爽歆此寵光可追封  
威寧王夫人

純直海加贈宣忠協力崇仁佐運功臣太傅開府儀同三  
司上柱國追封定西王改謚武穆制

翊扶興運聿懷佐命之臣申錫徽章庸盡勸忠之道曠言英傑  
夙著勲勞雖寵渥之已加顧褒崇之未至載揚顯冊追責幽局  
故益都行省都達魯花赤贈推忠宣力功臣金紫光祿大夫太  
尉上柱國追封溫國公謚忠襄珊瑚竹純直海器量恢弘材資驍  
勇夷強宗於朔漠覆勅敵於西陲護諸將而濯彼南征建大閫  
而保茲東夏奔走禦侮蓋無戰而不從經營告成斯有功而必  
報逮移鎮於關陝旋留戍於覃懷涉歷艱危削平僭叛克謹殺  
降之戒益廣好生之心全活不啻於千人爵位宜超於五等錮  
銅斷漆旣陟配於山陵胙土苴茅蓋肇開於王社躋榮帝傳視  
秩宰司考行易名疇功進號於戲龍光下被示恩數之非常焉  
鬣故封嗟爽靈之如在欽承不昧垂裕無窮可贈宣忠協力崇  
仁佐運功臣太傅開府儀同三司上柱國追封定西王謚武穆

純直海妻喜禮伯倫加封定西王夫人制

朕念祖宗開創之勤覽將帥勲勞之盛義弗遺於故舊恩允出於尋常矧伉儷之相成雖間閼而弗避宜並加於異渥庸少慰於重泉故益都行省都達魯花赤今贈宣忠協力崇仁佐運功臣太傅開府儀同三司上柱國追封定西王謚武穆珊竹純直海妻溫國夫人喜禮伯倫秉德柔嘉作配英傑儼戒式資於內助忠忱克簡於上知授鉞專征瓜牙之任弥重同舟共濟肘腋之變遽生脫良人於萬死之中殄叛寇於一鼓之頃訖使軍聲之後振豈惟婦道之可稱爰疏大國之封俾正小君之號於戲脂田載啓貴雖本於從夫厥管特書名永垂於信史欽予時命相爾有家可追封定西王夫人

也速解兒贈推忠宣力守正佐理功臣大傅開府儀同三

司上柱國追封安慶王謚武襄制

朕恭膺眷佑，續鴻業於宗祊，緬想賢勞，考舊章於盟府，有功必  
報，雖遠不忘。矧茲文武之宏材，為我祖宗之良弼，嗟光靈之如  
在，何冊禮之久稽。宜示褒崇，用揚休烈。故榮祿大夫、江浙等處  
行中書省平章政事也、速哥兒，性資沉毅，器識弘通，胸襟韜畧，  
之奇被服文儒之雅，夙陪禁近，備罄忠忱。方宰臣稟成算以專  
征，從伯氏提偏師而破敵，樓船飛渡，迄成百戰之功。金鼎調元，  
遂贊萬機之務，屬藩方之弗靖，扈清蹕以親行，運籌帷幄之餘，  
歸袞廟堂之上，力扶凋瘵，顯斥權姦，惟東南勝國之故墟，資將  
相重臣之坐鎮。既已風行而草偃，其如木壞而山頽。慨念夫間  
世之英傑，起不同時之嘆，峻躋品位，申慰泉扃，於戲超五等以  
䟽封，實為異數。節一惠以定謚，肇錫嘉稱，精爽有知，欽承無斁。

可特贈推忠宣力守正佐理功臣太傅開府儀同三司上柱國  
追封安慶王謚武襄

也速解兒妻忽都魯追封安慶王夫人制

事君以忠逮至久遠而彌著正位乎內必能夙夜以相成爰加  
錫命之隆式表從夫之貴故榮祿大夫江淞等處行中書省平  
章政事今贈推忠宣力守正佐理功臣太傅開府儀同三司上  
柱國追封安慶王謚武襄也速解兒妻忽都魯毓秀名閥作配  
元臣允武允文茂著經綸之業宜家宜室允崇伉儷之儀嗟歲  
序之屢更念褒封之未舉肇新茂典稽合彝章於戲媿德垂休  
既有光於盛烈娠賢濟美斯必享於榮名靈其歆茲沒不忘矣  
可追封安慶王夫人

阿里海牙追封江陵王制



經營四方肇建萬全之策弼成五服式開一統之期何賞典之  
已行而儀文之未稱覽外朝之上奏稽盟府之故藏啓壤地以  
增封錫贊書而告第故光祿大夫湖廣等處行中書省左丞相  
贈佐平南紀宣力功臣開府儀同三司太師上柱國追封楚國  
公謚武定阿里海牙材資敏達器量沉雄由侍從之邁聯預圖  
回之廟筭佐上相專征而遠畧致敵人納款以來歸龍驤飛渡  
於奔流虎旅留屯於分關據南土要衝之會絕東兵後顧之虞  
降旗果出於三吳傳檄遍行於百粵犀甲雕戈之軍容益振黃  
旗紫蓋之王氣盡銷輿圖咸入於版曹部曲並登於政路峻躋  
鼎席臨鎮藩維曹參之功名雖若次於蕭相國去病之親貴固  
宜比於衛將軍嗟有司久失敷陳在今日益加表異是用舉國  
家彝章之舊極人臣品秩之崇於戲超五等以疏恩今王亦爵

冠百僚而序位為帝者師尚其有知足以無憾可特贈宣威服  
遠輔德翊運功臣開府儀同三司太師上柱國追封江陵王仍  
謚武定

阿里海牙妻帖力并郝氏追封江陵王夫人制

朕緬想舊臣誕揚新命昭示非常之典均頒及內之章故光祿  
大夫湖廣等處行中書省左丞相今贈宣威服遠輔德翊運功  
臣開府儀同三司太師上柱國追封江陵王謚武定阿里海牙  
妻帖力并郝氏相其良人為時碩輔由室家欣助之益當朝廷  
委任之隆恭稟睿謀克成偉績鉤膺四牡備酬勲伐之勞副筭  
六珈彌著聞儀之盛厥惟賢配宜示寵褒於戲事君以忠既疏  
恩而啓慶從夫而貴尚婉德以垂休冥漠有知欽承不昧可並  
追封江陵王夫人

帖木兒塔失贈太師中書右丞相追封真寧王謚文忠制  
任人共政方隆巖石之瞻有命自天俄示台星之拆瞻言該輔  
奄就考終人興珍庠之嗟國有褒崇之禮故開府儀同三司上  
柱國錄軍國重事中書左丞相帖木兒塔失純明而博碩直亮  
而裕和稟間世之英姿際清朝之景運惟乃烈考事我

武皇出從綠車撫六軍而臨絕域入居黃闥宅百揆而熙庶工  
克生後賢丕承先業夙由華胄久侍嚴宸備著忠勤屢更委任  
秉事樞於西府揔憲度於中臺暨踐歷於政途遂延登於宰席  
愛君有魏徵之直諫憂國有房喬之善謀援聖經而罄竭於敷  
陳刊舊史而申明於監戒謂遠人之患難貴於存恤以全大體  
謂先朝之輔佐失於操切以圖近功至若虛庫庾以濟凶荒薄  
租賦以蘇疲瘵復科舉以通賢路招遺逸以振士風凡爾告之

嘉猷皆朕志之先定弗憊遺於一老俾贊襄於萬幾覽其訃音  
為之隕涕是用叅稽彝典並錫徽章循故秩以視儀推元功而  
進號峻躋右弼超冠三師加以殊勲賜之美謚疏王封於名郡  
揚制冊於廣廷褒絕前聞亶為異數於戲明良慶會莫盡展於  
經綸終始哀榮尚有光於窀穸爽靈不昧寵渥是承可贈開誠  
濟美同德翊運功臣太師開府儀同三司上柱國中書右丞相  
追封真寧王謚文忠

帖木兒塔失妻曲出封真寧王夫人制

容章下賁式昭佐理之功象服追崇庸舉從夫之典哀榮斯極  
今古所希故中書左丞相贈開誠濟美同德翊運功臣太師開  
府儀同三司上柱國中書右丞相追封真寧王謚文忠帖木兒  
塔失妻曲出淑慎而惠慈柔嘉而貞順提身禮範嫔德相門凡

謀猷入告之忠皆倣戒相成之力雖婦言不出於壺非可強名然王化必有其基莫先正始念黃閣清風之已遠憫佳城白日之俱歸爰考故常載頒新渥於戲䟽封異姓旣肇啓於大邦進號小君庸增光於同穴茲惟顯寵尚克欽承可追封異寧王夫人

尚家奴封東平王制

志士無求生以害仁不為苟合公論必須久而後定宜示明揚乃騰勳賢素懷忠直橫遭汙蟻良用盡傷爰俾率於勳章誕頒行於卹典故開府儀同三司中政院使尚家奴周通而醇謹果敢而沈雄家傳河山之盟身際風雲之會入趨禁闥侍間燕於穆清出從撫軍宣皇威於朔漠充膺上眷遂秉鴻樞總內壺之政權長潛藩之衛士展也近臣之選屬茲責胄之英暨先朝遠

狩於龍荒奉中宮肅登於鳳輦備嘗險阻靡憚馳驅幸衣衣之  
來歸驚乘輿之不駕力排群議誤抵深文肆予拊髀而興嗟念  
爾忘身而徇義是用疇元功而進號還故秩於視儀超五等以  
疏恩冠三師而序位考諸謚法褒以制詞極於褒榮全其終始  
於戲焚丹書而去籍盡滌前愆錫黻綬以啓封宜為異數尚其  
精爽服此寵靈可贈竭忠宣力守義著節功臣太師開府儀同  
三司上柱國追封東平王謚貞愍

尚家奴妻也先忽都封東平王夫人制

臣事君以忠既頒行於卹典婦從夫而貴宜並受於褒封錫以  
命書賁于丘遂故開府儀同三司上柱國追封東平王尚家奴  
妻也先忽都毓秀名族作配高門力贊其夫克秉純誠之德盡  
瘁于國迄成俊偉之功方應踐於要途何遽嬰於法網遭家多

舊儀俾進陟於號名用增崇於本始於戲百年廟食率遵歲祀  
之常七命侯封特表勲惠之盛益施陰祐茂對寵褒積慶侯林  
孚可加封種德積慶侯顯慶夫人王氏可加封育聖顯慶夫人  
主者施行

表

翰林國史院賀

正旦表

一氣洪鈞肇協始和之序九天黃道肆陳元會之儀寰宇均懽  
臣鄰胥慶欽惟

皇帝陛下堯神廣運湯德懋昭月竄天池揚風塵之號令蘭臺  
石室煥雲漢之文章茂對三陽誕膺百福臣等叨榮懿禁蓬迹  
鵷班散黼丹青莫寫化工之妙梯航玉帛惟觀壽域之同

國子監賀

正旦表

玄枵紀歲新曆象以更端太極受朝肅儀文而稱慶履臨所暨  
朴蹈惟均欽惟

皇帝陛下駿惠先猷丕昭嗣服體元建號道允協於重華備物  
隆名孝益嚴於長樂克承天貺式迓春祺臣等忝職教庠忝陪  
班序鴻鈞一氣難名有造之仁眉壽萬年申衍無疆之祚  
七政旋杓回陽和於蒼陸一人當宁展朝會於彤庭凡在生成  
實同慶賴欽惟

皇帝陛下宅心至正撫運重熙春育海涵播仁聲於庶類風行  
雷動敷治象於多方候應泰來祥開履吉臣等忝司六學獲旅  
千官瞻就日之清光載逢昌旦祝壽天之寶筭永固丕圖

中書省賀 正旦表

歲臨祈木藹瑞氣於神臯天近太微赫清光於黼座三朝嘉會



萬福來同欽惟

皇帝陛下凝命上玄宅心至正典學與春秋而俱富知人侔日月以並明震器夙成俾橫經而就傳譙光下施加備物以展親惠綏群黎函蒙慶澤臣等忝司政柄獲領朝紳金鉉調元莫贊皇猷之盛王卮稱壽願增寶筭之長

國子監賀

聖節表

虹流華渚肇開出震之祥龍見中星式應純乾之候三宮均慶百辟騰懽欽惟

皇帝陛下祗遵文謨丕隆舜孝雲行雨施等天地以無為日就月將與春秋而俱富欽時五福賴及萬方臣等忝職儒醫欣逢瑞節播南薰之至化鈞奏九成瞻北極之常尊嵩呼三祝頒度明堂允協乘離之候紀祥甲觀肇臨載震之期喜溢大庭

歡騰同宇欽惟

皇帝陛下宅心淵粹凝命穆清長樂承顏昭

聖人之孝治金華勸講開天下之文明茂對正陽益增神策臣等忝司教事欣覩朝儀律應薰絃並奏九韶之舞香浮合殿同稱萬壽之觴

寶輦歌風更化絃而出治璿樞繞電屆瑞節以受朝率土歡心昌辰盛典欽惟

皇帝陛下丕繩祖武誕舉皇綱照侔日月之明知人則哲量等乾坤之大御衆以寬庸伸報上之誠同致後天之祝臣等忝司佔畢獲旅縉紳金鑑效規莫助維新之政玉卮稱慶願綏有永之年

中書省賀

聖節表

歲舍在庚應虹沅之紀瑞月臨于巳瞻龍御之當陽綰典載行  
輿情胥慶欽惟

皇帝陛下居富盛之業撫熙明之期地重青宮崇教事以端國  
本天開華閣陳古訓以宣人文茂對嘉辰荐膺多祉臣等忝居  
政府肅領朝儀接武泰階莫贊無為之化發祥神筴願符有道  
之長

國子監賀冊

太皇太后表

德為

聖人治有光於舜孝養以天下禮益謹於漢儀備物隆名熙朝  
盛典欽惟

皇帝陛下誕膺駿命寅御丕圖黼座端臨念皇慈之保佑綸  
言播告極鴻號之尊崇事遠邁於古先慶旁流於中外臣等幸

專教席獲旅廷紳傾向日之微忱遙瞻廣內祝齊天之睿筭永奉慈闈

國子監賀冊

皇后表

顯冊誕敷肇正宮闈之號鴻圖增重益隆宗社之基慶輯邦家  
謹均華夏欽惟

皇帝陛下道尊皇極治本人倫與日俱新剛健允符於乾德自  
天作合順承式表於坤儀命出楓廷禮成椒掖臣等濫司教事  
欣觀昇章關雎正始之風四方來賀既醉太平之福萬壽無疆  
國子監賀  
太皇太后正旦表

獻歲發春肇正孟陬之序隆名脩物載新長樂之儀嘉與外廷  
肅稱元會欽惟

太皇太后殿下道光內治德配  
先朝尊極宮闈誕舉推崇之

禮慶流宗社彌章擁佑之功履茲端辰哀時多祀臣等忝司教  
育獲預班聯絳闕天開恭展三朝之拜瑤池日永歡騰萬歲之  
呼

國子監上 太皇太后賀冊 皇后表

禮行當宁丕昭文定之祥尊極重闈茂衍徽音之嗣驩騰禁掖  
喜浹寰區欽惟

太皇太后殿下德備儉慈功參覆載承先朝之付託克協孫謀  
建中書之表義式資婦順流輝華於椒屋增華固於蘿圖臣等  
忝職上庠欣逢盛典二南正始大義本於家人萬壽無疆介福  
歸於 王母

牋

翰林國史院賀 皇后正旦牋

春回椒掖茂迎百福之祥天近楓宸均備三朝之禮懽騰廣內  
喜溢羣工敬惟

皇后殿下淑德純全徽音夙著中顰黃裳之美恪謹柔儀上作  
紫極之尊永綏吉履肇臨穀旦並介蕃禧臣等忝職文詞獲陪  
班序化行宮壺願新彤管之書慶衍邦家敬上玉卮之壽

中書省賀

皇后正旦牋

璣衡密運回玉律於青陽翬翟令儀應軒星於紫極慶行中壺  
喜溢大廷敬惟

皇后殿下德並神明功叅覆載體家人之正位肇立化基志卷  
耳之求賢助成治道春生穀旦天錫蕃禧臣某等充職宰司謹  
班元會載新椒頌展盛禮於三朝永固蘿圖登壽年於萬壽

國子監賀

皇后受冊牋

嘉禮脩成正柔儀於內壺隆名載舉享大號於外廷治首六宮  
歡形八表敬惟

皇后殿下性全淵哲德並神明玉冊金相茂輯彌文之盛翬衣  
綸翟光昭象服之崇稽合舊章實為鉅冊臣等叨居簪序獲綴  
朝班瞻北極之四星祥開吉旦祝南山之萬壽慶衍齊年

箴

明樂齋箴

伯陽甫取孔門記言名齋居之室曰明樂予竊嘉其能得朋而  
懼夫樂之或過其節也為之箴曰

天壤之間並生者人矧曰同類具有弗親孰予之從來之紛若  
匪善何信匪信何樂相古易象示人以朋毋敢適莫惟德是徵  
復而朋來寔用無咎坤以喪朋厥慶終有一陽之至我其族焉

三陰之聚我其舍旃豈茲記言與易殊指便辟佞柔既曰損矣  
二人同心其樂也康比之匪人其樂也荒猗伯陽甫式謹爾類  
交游司規敢告閭隸

銘

勤有堂銘

皇錫下人展也良貴能者守之罔敢怠棄惟勤為常非有為異  
反身而誠萬物咸備其勤斯何所壽以之雖休勿休伊誠之思  
其有斯何匪我也私不物於物而誠之為孰躬而躬閔勉朝夕  
封畧殖驕執為已得一元默運其生職職天德之脩人道之極  
猗君之為厥志允臧式敬爾承勿助勿忘閑邦存誠充實輝光  
我曷振之勒銘茲堂

兼善齋銘



墨責兼愛儒者擯之詎曰此道我之得私必由其本以及其支  
相古先民孰為我師莫窮匪顏莫達匪伊何志何學朝斯夕斯  
乾之善世則固敢知坤之積善尚其孳孳止也以所動也以時  
毋慕千里忽於毫釐仁如夷吾或羞其卑為善有術視我銘詩

腴晦齋銘

王君仲致以腴晦名其齋蓋有取乎考亭朱子冠而字之祝辭  
云爾夫所謂人晦於身神明內腴者復而通也今乃援其辭而  
左之者通而復也仲致來徵銘為之銘曰

惟皇播物終始一誠屈伸相推乃色乃形有出于幽以豐而亨  
有入斯息明夷之貞而通而復與時偕行展也王君歟其華英  
退藏於密以觀其生與造物者游神之廷曰子庶樂天之性情  
我曷相之式彰茲銘

恒德齋銘

易之為義隨時變通有不變者確乎其中是曰恒性人之固有  
充為恒德不息則久聖人之道久而化成由其不息是之謂恒  
惟君法天偕行偕極惟臣承君咸有一德繫公之先國之元臣  
篤生後賢左右

聖君吾儕小人朝不及夕夫孰如公自強不息體之既立其用  
必行措諸事業乃恒之亨允懷于茲益謹其度與國同休以永  
終譽

興讓堂銘

何官員立起進士官七品法當封父母及妻父以讓于其祖妻  
以讓于其祖母有司如其請以聞賜恩既行乃扁所居之堂曰  
興讓名人鉅公樂道其事紀載而誦詠焉君出以示予因系之

以銘曰

讓之為義推已所有水水本原則有所受子承其考婦繼其姑  
家之積慶匪我有餘嗟嗟末俗借鋤取帚孰視爾民俾歸于厚  
施由親始千乘可輕義以起禮善不近名 皇仁在上孝子不  
匱奕其龍光恩榮備至爰達稱號樹之風聲一家之讓國人其  
興作為銘詩薦此樂石匪私其家維以勸德

方齋銘

鄱陽胡君以方齋扁讀書之室而俾其子益來徵銘為之銘曰  
輿之方輪以圓而相資鑿之方枘以圓而相違天下之方盡於  
五寸之矩所不能盡者物情之不齊是故君子方以正己之度  
圓以任物之宜主至靜以為德不自毀于腓隨匪惡圓而喜方  
諒所秉之莫移爾息爾藏矩範在茲無矜而名尚允蹈之

圓硯銘

翼之家藏王使君所貽圓硯有白文貫其腹銘曰  
黑之守處也久白之不涅歸也潔

青石硯銘

雪竇方丈所蓄青石硯德壽故物也銘曰  
匪琥其白匪璋其赤夫蒼蒼者天之正色韞匱而藏守之以黑  
母曰茲宋之隕石也

息菴銘

上人允茲扁其菴曰息因以自號蓋扁以彰所息之處號以表  
能息之人能所相為無窮吾未見其息也上人來徵銘為之銘  
曰

謂菴非人孰累於名謂人非菴名孰與息者境能息者智

菴耶人耶依正不二剎那之頃能所雙亡十劫何短一息何長  
勿生疲勞而止中路咄茲草菴非汝住處

朽室銘

朽室者上公楨公之所居也浮屠氏之法衣壞色食瓦鐵其以  
朽室為居固宜然予觀一切世間成住壞空非有定相朽與不  
朽即涉二邊假名無實何取何捨輒因安陽韓先生之言而申  
繹之以為銘曰

身如虛空不係於物出三界家寧事一室善哉上人此休歇處  
惟適之安隨其所遇塔焉枯坐兀若槁木敗壁頽簷容膝而足  
因緣幻境空華露電茫茫火宅終歸壞散有者形不朽者理  
皆本非成今亦無毀入如來堂應如是住金剛堅強永保貞固

止足齋銘

有為老氏之學者四明陳君扁所居室曰止足予懼其務內而忘外取小而遺大也為之銘以充其志焉銘曰

人於兩間如海一粟萬物備矣匪我也獨昧者失之欲乃逐逐及身而樂伊誠之復道何遠而唯止斯足勿安一枝而甘滿腹願曰我道無殆無辱銘以申之予告非瀆

尊德齋銘

汝南蔣士權伯衡有志操力學績文尤長於篆隸武夷杜徵君愛之為作尊德齋扁其讀書之室金華黃潛為之銘曰

天降生人曰有明德君子得之有物有則保養所賦敬共奉持外欲弗肆內德弗墮尊德樂義所尊在人尊德間學所尊在身道立德尊卓哉先覺惟伯衡氏究心聖學

存存齋畫像贊

孔氏之大宗曰存齋先生宋季襲衍聖之封已久

國朝至元間召赴闕俾仍嗣襲先生力辭遂以國子祭酒提舉  
浙東學校世平於先生兄弟也惜其以存自號而不能欽承  
上意存其封爵因自稱曰存存齋且屬予贊其畫像云

東家之傳号有本有支弗居其名号匪德之衰德則可以号可  
止者時猶有天爵号繫我所縻金石絲竹号家聲之遺有能宗  
予号文不在茲表以丹青号展也令儀巍然靈光号人皆仰之

程楚公小像贊

故楚國文憲程公以宏材碩學被遇

世祖歷事四朝為時名臣延祐紀元之初潛舉進士至京師因  
拜公于安貞里第後三十有三年潛起自休致入直詞林則公  
捐館已久幸從公之孫世京獲觀公遺像撫時運之推遷慨前

脩之莫作贊以一辭非敢曰美盛德之形容聊志歲月云爾贊  
曰

褐衣角巾瀟洒出塵仰羨夫消搖於丘壑緬想其際會於風雲  
覲一言之寤意罄宗論而敷陳灼灼乎龜著之可覆洋洋乎魚  
水之相親激揚奮厲以紀綱乎憲度鋪張潤色以黼黻乎人文  
雖不以進退百官為職未始一日忘吐握之勤凡楚材之晉用  
皆藥籠之儲珍咸懷誠而秉忠共尊主而庇民奚必坐乎廟堂  
之上然後大展其經綸嗟儀刑之已遠儼手彩之如新古稱達  
賢者有後是將在其來昆

學軒贊

器必琢而後成道必學而後知玉之不琢不失其為玉人之不  
學不失其為人也幾希是以有志之士莫不務學而求師虛以



為受教之地明以察進善之幾蓋深造以道固貴於升堂而入  
室取其虛明則於軒為宜居焉游焉朝斯夕斯嚮晦宴息尚要  
其歸請為學軒之贊亂以心齋之詩

李御史畫像贊

質厚而豐神完而充生乎相閑初無貴驕之色立乎朝著常存  
肅穆之容挺拔於翠竹碧梧之表泳游於祥雲麗日之中挹其  
光儀者猶可想見夫喬水世臣黃閣清風也

蕭侯畫像贊

侃侃之色暨暨之容垂紳正笏不動聲氣而精神隱然折萬里  
之衝蔚乎豹變之文彪于外而彌于中溫其如玉穆如清風望  
其餘光者孰知為萬夫之雄也耶

瑞像贊

仁和孫翁誦法華經三十年感異僧遺以一石久之忽有觀世音大士像涌現其中見者莫不歎駭以為殊勝希有之事為之贊曰

三界之中萬法唯識石非動物何識何知而能有此如幻三昧由理具故事相宛然當知法身徧一切處假名依正一念三千我心與石等無差別若聞若見應作是觀同證如來不思議境

王真人七十壽像贊

列仙之癯澤夫道腴合氣乎元和游神子太虛其應也無方而環中以為樞是宜長上古而不老等天地於籟廬視人間之七袞持塵劫之斯須拖其光儀清風穆如古所謂博大真人者茲非其徒歟

雲外慶公畫像贊

堂堂獨立無與為對  
描畫虛空徒勞藻績  
一雲所雨何內何外  
勿於其間自為隔礙  
寶相儼然靈山一會

擊蛇笏贊

於烈孔公碩大且方  
麟鳳在郊百恠歛藏  
爾蟲何知乃罔畏忌  
怵彼蚩蚩改聽勿視  
維是手板猶古壁圭  
千鈞則重驪鼠則微  
憤激於中有弗遑計  
寧使妖血狼藉沾漬  
展也先覺俾民不迷  
九原莫作物是人非  
人之非兮鰭鯨之舞  
尚有聞孫曰予禦侮

金華黃先生文集卷第七